

A tal efecto, nas listas que se elaboren no citado ámbito farase constar de forma diferenciada a relación de persoas aspirantes que acreditaron o/s indicado/s mérito/s.

### **3. XESTIÓN DE CHAMAMENTOS**

#### **3.1. Organo competente**

**3.1.1.** As direccións de Recursos Humanos das áreas sanitarias serán as responsables da coordinación e xestión de chamamentos do seu respectivo ámbito territorial, previa determinación das necesidades de vinculación que efectúen os órganos de dirección dos centros e entidades localizados en dito ámbito.

Dita atribución competencial enténdese sen prexuízo das adaptacións que resulte necesario efectuar respecto da mesma ao abeiro dos decretos de estrutura e ordes de delegación de competencias vixentes en cada momento ou por razóns organizativas.

**3.1.2.** Como excepción, nas listas de ámbito autonómico correspondentes ás categorías de médico/a coordinador/a do 061, médico/a asistencial do 061 e enfermeiro/a do 061 a coordinación e xestión dos chamamentos efectuaranse pola dirección da *Fundación Pública Urxencias Sanitarias de Galicia-061*.

#### **3.2. Procedemento de realización das ofertas de vinculación**

##### **3.2.1. Procedemento xeral telemático**

A comunicación ás persoas aspirantes das ofertas de vinculación temporal que xurdan realizarse prioritariamente utilizando medios telemáticos.

A tales efectos, no sistema de información *Fides/expedient-e* ou aplicación informática que, de ser o caso, substitúa a este, habilitarase un módulo específico de contratación telemática, ao que as persoas aspirantes deberán acceder para poder visualizar e seleccionar, por orde de preferencia, as diferentes ofertas de cobertura que se realicen, en todas as listas nas que figure inscrito/a.

As persoas admitidas e dispoñibles nas listas de contratación, así como as que aínda non constanding admitidas na lista vixente teñan formalizada a súa inscrición, encontrándose esta en estado validado ou confirmado rexistrado e coa titulación de acceso validada, cando haxa ofertas de selección temporal para a súa categoría/especialidade, recibirán unha previa comunicación vía SMS, e/ou correo electrónico informándolles de que existen novos nomeamentos temporais dispoñibles. Dita comunicación virá acompañada dun enlace que lles permitirá acceder ó módulo de *Fides/expedient-e* de contratación telemática.

O acceso a este módulo efectuarase a través de **Chave365** ou certificado dixital válido: FNMT, DNI electrónico ou Camerfirma.

##### Tramo horario de visualización e selección das ofertas de vinculación:

Diariamente, de luns a venres, entre as 20.00 horas do día anterior e as 10.00 horas de cada unha das xornadas farase visible a través de *Fides/expedient-e* a oferta de nomeamentos dispoñibles das distintas categorías e ámbitos de xestión.

O tramo horario indicado poderá ser obxecto de adaptación, cando razóns organizativas debidamente xustificadas así o requiran, previo informe á Comisión Central de Seguimento do Pacto e coa debida publicidade.

Os nomeamentos de longa duración e os correspondentes a bloques de vacacións deberán permanecer visibles na aplicación, como mínimo, durante os cinco días anteriores á data prevista para o inicio da prestación de servizos.

A persoa aspirante no tramo horario que se indica visualizará todas as ofertas dispoñibles das listas nas que estea inscrita e que, agás no suposto de melloras, non se superpoñan con vínculos xa formalizados.

Neste proceso telemático, a persoa aspirante poderá, dentro do prazo establecido anteriormente, seleccionar o/s nomeamento/s no/s que estea interesada pola orde de preferencia desexada.

Da selección efectuada pola persoa aspirante quedará trazabilidade no sistema de información *Fides/expedient-e*. Ademais, o/a aspirante terá á súa disposición en *Fides/expedient-e* unha copia do formulario coa última selección efectuada.

No suposto de efectuar varias modificacións do formulario de selección dentro do prazo habilitado en cada xornada, tomarase en conta, para a adxudicación, a última modificación efectuada pola persoa aspirante.

A falta de selección pola persoa aspirante de todas ou parte das ofertas dispoñibles non dará lugar a ningún tipo de penalización.

Unha vez finalizado o prazo de selección, o sistema procederá á adxudicación automatizada das ofertas de contratación visibles en cada xornada, entre os/as aspirantes que tiveran participado no proceso, en función da súa orde de posición nas listas.

Todas as persoas aspirantes que tiveran seleccionado algún nomeamento, resultasen ou non adxudicatarios do/s mesmo/s, recibirán confirmación vía Sms e/ou correo electrónico do resultado da súa participación.

No suposto de resultar adxudicatario/a, recibirá ademais o enlace para a visualización do nomeamento temporal asignado e unha indicación coa data, hora e lugar onde debe presentarse para o inicio da prestación de servizos.

O/a aspirante que resultando adxudicatario dun nomeamento non o acepte, ou non se incorpore á prestación de servizos na data sinalada, será penalizado/a nos termos dispostos na cláusula IV do presente Pacto

### **3.2.2. Procedemento mediante comunicación telefónica**

Finalizado o procedemento de adxudicación automatizada de cada xornada, se resultasen ofertas de nomeamentos sen adxudicar que, pola proximidade da data de inicio, non fose posible incluír no seguinte ciclo de contratación telemática, procederase á cobertura das mesmas mediante chamamento telefónico.

A tal efecto, o órgano competente da xestión de chamamentos efectuará dúas chamadas por persoa aspirante, segundo a orde de prelación que corresponda consonte as normas establecidas no presente Pacto, nas que se procurará que o intervalo entre cada unha delas non sexa inferior a 10 minutos. Se realizadas estas non se tivese contactado coa persoa aspirante, poderán seguirse os chamamentos pola orde correspondente.

Toda comunicación telefónica que se efectúe quedará debidamente rexistrada, deixando constancia da data e hora de realización, o obxecto da chamada así como a identidade da persoa

que realiza a mesma. Así mesmo reflectirá a identidade da persoa receptora da chamada, de ser distinta da persoa aspirante.

O rexeitamento ao nomeamento proposto, sen causa xustificada, penalizarase nos termos dispostos na cláusula IV do presente Pacto.

A persoa aspirante para resultar adxudicataria dun vínculo de carácter temporal deberá reunir, na data de formalización de cada nomeamento, os requisitos exixidos na cláusula 2.1.1. do presente pacto.

### **3.3.2. Disposicións especiais**

#### **3.3.2.1. Listas de ámbito autonómico**

Nos supostos de listas de ámbito autonómico, excepto as correspondentes á Fundación Pública Urxencias Sanitarias de Galicia-061, a adxudicación automatizada dos nomeamentos ou, de ser o caso chamamento telefónico, efectuaranse, en primeiro lugar, entre os/as aspirantes que seleccionasen como distrito de opción preferente aquel no que se produce a necesidade da concreta vinculación.

En segunda volta, efectuaranse por rigorosa orde de prelación na lista, con independencia da opción de preferencia manifestada polo/a aspirante.

Ás persoas aspirantes vinculadas nun distrito seleccionado como preferente, poderán resultar adxudicatarias dos vínculos de longa duración que xurdan noutro/s distrito/s seleccionado/s como preferente/s. A aceptación do nomeamento nun distrito distinto ao de vinculación terá carácter voluntario. No suposto de renuncia, a persoa aspirante permanecerá como indispoñible para sucesivas ofertas de nomeamento nese mesmo distrito ata a finalización do seu vínculo.

#### **3.3.2.2. Listas compatibles**

As persoas aspirantes admitidas en listas compatibles que estean vinculadas por un nomeamento de curta ou longa duración nunha destas categorías ofertaráselles os vínculos de longa duración da categoría compatible. Así mesmo, ás persoas aspirantes admitidas en listas compatibles que estean vinculadas por un nomeamento de longa duración nunha destas categorías ofertaráselles os vínculos de curta duración da categoría compatible. Nestes supostos, se a persoa aspirante renuncia a un nomeamento de substitución de longa duración na outra categoría de inscrición, permanecerá como indispoñible para sucesivos nomeamentos deste tipo nesta última ata a finalización do seu vínculo, permanecendo só como dispoñible para vínculos como interino en praza vacante. A renuncia a un nomeamento de interinidade suporá a indispoñibilidade para sucesivas ofertas nesta última categoría ata a finalización do vínculo na outra categoría compatible.

No suposto de renuncia a un nomeamento de curta duración, a persoa aspirante permanecerá como indispoñible para sucesivas ofertas de curta duración na categoría compatible e só dispoñible nesta categoría para nomeamentos de longa duración.

#### **3.3.2.3. Promoción profesional**

En cada categoría e distrito, o 50% dos nomeamentos estatutarios de interinidade en praza vacante e demais que se estimen, inicialmente, de duración igual ou superior a 2 meses, que resulte necesario formalizar, expediranse a favor das persoas aspirantes que figuren admitidas pola quenda de promoción profesional.

Para a adxudicación de tales nomeamentos seguirase en cada distrito e categoría a orde de puntuación acreditada, sen prexuízo dos supostos de suspensión regulados neste pacto.

Nas listas de ámbito autonómico, a reserva do 50% dos nomeamentos a esta quenda efectuarase en cada distrito sanitario.

#### **3.3.2.4. Áreas especiais**

Os nomeamentos para tales áreas efectuaranse seguindo a orde de prelación da lista e a favor das persoas que acrediten a experiencia e/ou formación requiridas no apartado 2.5. do presente pacto.

Só poderán formalizarse nomeamentos ao abeiro da presente epígrafe para o desenvolvemento de funcións nas áreas que se indican no punto 2.5. do presente pacto e sempre que quede debidamente xustificada a necesidade da súa cobertura por profesional que acredite experiencia e/ou formación no citado ámbito.

En todo caso, excluírase de tal sistema a cobertura das prazas vacantes e as substitucións dunha duración previsible superior a 180 días, que se proverán na forma ordinaria.

En caso de non existir aspirantes dispoñibles nas listas definitivas dunha área especial, acudirase en primeiro lugar a aqueles/as aspirantes inscritos/as nas listas da respectiva categoría que solicitaron e superaron a formación prevista no punto 2.5. con posterioridade á data da última xeración ou teñan acreditada unha experiencia profesional mínima de dous meses na concreta área e categoría en institucións sanitarias do Sisteima Nacional de Saúde ou institucións sanitarias privadas concertadas ou con autorización de uso.

A ordenación dos/das aspirantes neste suposto virá determinada pola posición que ocupan na lista xeral.

#### **3.3.2.5. Nomeamentos de curta duración (pool)**

O chamamento das persoas aspirantes incluídas nas listas especiais para nomeamentos de curta duración previstas na cláusula 2.6. do presente pacto levaraa a cabo o órgano da respectiva área sanitaria, con competencias en materia de recursos humanos, que determine a respectiva xerencia, seguindo rigorosamente a orde de puntuación acadada por aquelas e de forma rotatoria entre as persoas que figuren como titulares na lista correspondente.

Cada nomeamento que se expida a favor das persoas aspirantes incluídas nas citadas listas non poderá exceder os catro días. O número máximo total de días de vinculación por persoa aspirante e mes non será superior a doce.

A incorporación da persoa aspirante a unha lista especial para nomeamentos de curta duración non afectará á súa dispoñibilidade para as vinculacións de duración igual ou superior a tres meses que lle correspondan pola orde de prelación que ocupen na lista xeral.

A formalización de nomeamentos a tempo parcial efectuarase con carácter preferente ,entre aqueles/as aspirantes admitidos/as nas listas de curta duración que tiveran manifestado voluntariamente a súa dispoñibilidade para este tipo de vinculacións.

### **3.3.2.6. Nomeamentos a tempo parcial**

1. A adxudicación de nomeamentos a tempo parcial nos centros e institucións do Sistema Público de Saúde de Galicia efectuarase a favor das persoas aspirantes que manifestasen expresamente, nos termos da cláusula 3.7. do presente pacto, a súa opción de dispoñibilidade á formalización do dito tipo de vínculos, respectando a orde de puntuación acadada.

O rexeitamento, sen causa xustificada, á proposta de nomeamento efectuada telefonicamente penalizarase nos termos dispostos no apartado 4.1. do presente pacto.

2. Nos supostos de indispoñibilidade de profesionais con opción voluntaria á formalización de nomeamentos a tempo parcial, os chamamentos efectuaranse entre as persoas aspirantes que figuren inscritas na lista da respectiva categoría, con independencia da opción formulada e seguindo rigorosamente a orde de puntuación. A renuncia ao nomeamento proposto penalizarase nos termos do apartado 4 do presente pacto.

### **3.3.2.7 Mellora de vinculación**

A formalización de nomeamentos de longa duración a xornada completa ofertarase, en todo caso, á persoa que acredite a maior puntuación na lista do distrito sanitario ou ámbito territorial que corresponda, con independencia de que aquela estea vinculada, ao tempo do chamamento:

- a) Por un nomeamento estatutario temporal a xornada completa de curta duración.
- b) Por un nomeamento a tempo parcial calquera que sexa a súa duración.
- c) Por un nomeamento de substitución a xornada completa de longa duración. Neste suposto só cando o vínculo a ofertar sexa unha interinidade en praza vacante.

Así mesmo, e como excepción ao establecido con carácter xeral neste pacto respecto da suspensión de chamamentos, no suposto de nacemento de fillo/a, adopción legal, suspensión por risco durante o embarazo e incapacidade temporal común derivada de embarazo, ofertaráselle á persoa aspirante os nomeamentos correspondentes á súa categoría. De corresponderlle, segundo a orde de prelación que ocupa na lista a adxudicación dun vínculo, formalizarase o correspondente nomeamento desde a data prevista de inicio da prestación de servizos, naqueles supostos nos que a normativa de seguridade social así o permita.

En todos os supostos recoñecerase como tempo traballado a efectos administrativos o período de duración dos vínculos que pola súa orde de posición na lista, lle correspondesen.

### **3.3.2.8. Nomeamento eventual ou emerxencia sanitaria**

Este nomeamento ofertarase como mellora de vinculación ás persoas aspirantes que acrediten maior puntuación na lista e non estean vinculadas por un nomeamento de longa duración.

Se a persoa aspirante á que se lle oferta este nomeamento está vinculada por un nomeamento de curta duración, a aceptación do vínculo será voluntaria e, en consecuencia, non penalizable. Se non mantén ningún vínculo, o seu rexeitamento será penalizado consonte as normas xerais do pacto.

A persoa aspirante que acepte este nomeamento permanecerá como dispoñible para vínculos de longa duración, de conformidade co procedemento xeral que se establece no punto anterior.

### **3.3.2.9. Nomeamentos de curta duración no ámbito da Fundación Pública Urgencias Sanitarias de Galicia-061**

Os nomeamentos para prestar servizos como enfermeiro/a na Fundación Pública Urgencias Sanitarias de Galicia-061, de duración previsible non superior a 180 días efectuaranse, con carácter preferente, a favor das persoas aspirantes que, por rigorosa orde de prelación, tivesen acreditado a experiencia e/ou formación requiridas no apartado 2.8. do presente pacto.

### **3.3.2.10. Nomeamentos en prazas reservadas para seren cubertas por persoas que acrediten discapacidade intelectual**

O chamamento efectuarase, en primeiro lugar, por orde de prelación, entre os/as aspirantes que tiveran seleccionado como distrito sanitario de opción preferente aquel en que se produce a necesidade da concreta vinculación. Na segunda volta, o chamamento efectuarase por rigorosa orde de prelación na lista, con independencia da opción de preferencia manifestada pola persoa aspirante.

Procurarase que o chamamento das persoas aspirantes se efectúe cunha antelación mínima de sete días ao inicio da vinculación.

A renuncia por un/unha aspirante desta lista a un nomeamento fóra da súa localidade de residencia habitual non dará lugar a ningún tipo de penalización.

Ás persoas aspirantes que consten admitidas na lista de selección temporal da respectiva categoría, polo sistema xeral de acceso e que estean vinculadas por un nomeamento de longa duración formalizado pola lista de aspirantes con discapacidade intelectual, ofertaráselles os nomeamentos de longa duración que lles puideran corresponder segundo a súa prelación na lista xeral.

### **3.4. Indispoñibilidade transitoria de aspirantes**

No suposto de indispoñibilidade de aspirantes nunha determinada categoría e ámbito territorial, e ata a seguinte xeración de listas que se efectúe segundo o disposto no apartado 2.4.4. do presente pacto, deberá procederse segundo a orde que se indica a continuación:

1. En primeiro lugar, se a oferta de nomeamento é inferior a 60 días acudirase aos aspirantes admitidos na lista da respectiva categoría e ámbito, pola quenda de promoción profesional.
2. A Continuación, o/s nomeamento/s resultará/n adxudicado/s a aqueles/as aspirantes sen vínculo que estando admitidos/as nas listas da mesma categoría noutro distrito sanitario, tiveran manifestado voluntariamente a súa dispoñibilidade para prestar servizos no distrito en que xorde a necesidade de vinculación.

Para os efectos do previsto no parágrafo anterior, as persoas aspirantes poderán facer constar nos formularios de solicitude e inscrición en lista a súa dispoñibilidade para prestar servizos, a xornada completa, fóra do distrito orixinario de adscrición, no número de distritos que o/a aspirante indique.

A prestación de servizos a tempo parcial fóra do distrito orixinario de adscrición será voluntaria para o/a aspirante.

Previamente a efectuar tal adxudicación verificarase que no ámbito territorial no que figura admitido/a o/a aspirante se dispón de suficientes dispoñibles.

**3.** En seguinte lugar acudirse á utilización das listas desa categoría dos distritos de xestión máis próximos.

Para os efectos do previsto no parágrafo anterior, considéranse distritos de xestión máis próximos, ou distritos limítrofes, os que se determinan, respecto de cada distrito concreto, no anexo deste pacto.

Neste caso, a prestación de servizos fóra do distrito orixinario de adscrición será voluntaria para o/a aspirante.

Nos mesmos termos que no suposto anterior, previamente a efectuar o chamamento verificarase que no distrito de inscrición do/da aspirante se dispón de suficientes dispoñibles.

**4.** En cuarto lugar, se a oferta de nomeamento é inferior a 3 meses acudirse ás persoas que figuren como titulares na lista de nomeamentos de curta duración (pool) na lista da respectiva categoría e ámbito.

**5.** Non existindo aspirantes da mesma categoría nos apartados anteriores deberá procederse da seguinte forma:

Naquelas categorías para cuxo ingreso se requira unha titulación académica específica, efectuarase o chamamento a favor daqueles/as aspirantes que estean en posesión do dito título e que tivesen formalizado en Fides/expedient-e a solicitude de inscrición nas listas de selección temporal/promoción profesional da categoría con posterioridade á data límite de inscrición para as listas en vigor nese momento. A ordenación dos/das aspirantes en cada distrito efectuarase pola data de obtención do título/especialidade, de modo tal que o/a aspirante coa data de obtención do título anterior se situará no primeiro lugar da orde de prelación. En caso de empate, efectuarase a ordenación, en primeiro lugar, pola data de rexistro da inscrición e, de persistir o empate, pola data interna de alta da inscrición en Fides/expedient-e, e situarase en ambos os supostos a máis recente en último lugar.

Naquelas categorías para cuxo ingreso non se requira unha titulación específica de acceso, efectuarase o chamamento a favor daqueles/as aspirantes que tivesen formalizado en Fides/expedient-e a solicitude de inscrición en listas de selección temporal/promoción profesional da categoría con posterioridade á data límite de inscrición para as listas en vigor nese momento. A ordenación dos/das aspirantes en cada distrito efectuarase en primeiro lugar tendo en conta a puntuación acadada polo/a aspirante na última OPE convocada e resolta polo Servizo Galego de Saúde na categoría á que opta. En caso de empate, efectuarase a ordenación, en primeiro lugar, pola data de rexistro da inscrición e, de persistir o empate, pola data interna de alta da inscrición en Fides/expedient-e, e situarase en ambos os supostos a máis recente en último lugar.

Respectarase nos chamamentos a efectuar por este criterio a mesma alternancia, promoción profesional e acceso libre que se contén no apartado 3.3.2.3. do Pacto.

**6.** Por último, en sexto lugar, serán subsidiarias entre si aos efectos da formalización de nomeamentos as listas de persoas aspirantes das categorías que se detallan no anexo II deste Pacto.